

कण्ठपोश

(वाख सोम्बॅरन)

श्यन खण्डन मंज


वाख सोम्बॅरन

(वाख सोम्बॅरन)

703

कोंगें बागस मंज कोंगेंदूर शूभान
चमकान फुलया जून् पछस मन्ज
बोनि हवाहस मंज बोनि सबजाराह
वोजॅलान बोनिपन हरदें स्यतस मंज

चमन लाल राजदान



श्रीनगरें दिसंबर 1938 हस मंज ज़ामुत श्री चमन लाल राजदान कोर बी. ए. तमि वक्ताचि जम्मू व कश्मीर यूनिवर्सिटी प्यठें श्री प्रताप कॉलेज श्रीनगरें मंजें पास । 1960 क्रिस शरूहस मंज कॅर राजदान सॉबन यिहॉय यूनिवर्सिटी ऑक्सि असिस्टंट क्रिस हेंसियतस मंज जोयिन येति यिम सीनियर डिप्टी रजिस्ट्रार केय । यिमव कॅर बहेंसियत अप्रसर तति मुख्तलिफ तें अहम यूनिट निगरेंनी । नोकरी करान-करान कोर यिमव जम्मू यूनिवर्सिटी प्यठें पुलिटिक्ल साइन्स मंज एम. ए. पास । यूनिवर्सिटी हेंन्डिस जम्मू सब-आफिसर मंज रूक्य यिम रेंन वरियन बहेंसियत आफिसर-इन-चार्ज तें अती प्यठें गॅय यिम दिसम्बर 1998 तस मंज रिययर ।

राजदान सडॅब ऑस्य बहेंसियत अख तालिख-ऑलिम्पि कॉलेजक्रिस मैगज़ीन्स तें बेयि अखबारन मंज मंजमू लेखान । रिययर गच्छे पतें रूक्य राजदान सडॅब अप्रेज़ी ज़बॉन्य मंज मंजमू तें बेयि हिन्दी तें कौशिरिस मंज भक्ति लीलयि तें भजन लेखान । अंध्र मंज कोर भगवान गोपीनाथ जी महाराजन यिमन प्यठ अर्प्रेह तें यिम केय तिहेंक्य भक्त । यिमव करि चोर लोकेंचि क्ताबें जेरी यिमन मंज भगवान जियिन्य अममोल वक्न, श्री बब भगवान चालीसा (हिन्दी तें कौशुर) शॉमिल छि अमि अरुवें ति लीख्य यिमव भजन तें लीलयि यिम मुख्तलिफ जेनलन तें क्ताबन मंज छापनं आयि । श्री बब भगवान चालीसा सपुद स्यठेंहॉय मकबूल चाहे परनबोल भगवान जिनुन भक्त ओस या नें ओस । येम यि चालीसा अकि लटि बूज़ सु रूद यि हर विजि बोज़ान, परान तें मनेच शॉन्ती हॉसिल करान ।

राजदान सडॅबन लीख्य केंह वाख ति कौशिरिस मंज । यिहॉय वाखें सोम्बरन छे यथ "कण्ठपोश" क्ताबि मंज तोहि पेश यिवान करेन । राजदान सडॅबनिस पिता जियस ओस नाव पं. कण्ठ जू तें माता जी हुन्द नाव श्रीमती पोशकुज्य । यिहुन्द ज़नम छु ऑल्य वक्लस मंज सपुदमुत तें यिम छि बायन मंज सारिन्य कौन्स्य । माता-पिता छि भगवान भक्त ऑस्यमैल्य तें तयुक असर प्यव यिमन प्यठ ति । यिमव छु मोल्लिस-माजि हदिस नाक्स प्यठें येमि क्ताबि हुंद नाव "कण्ठपोश" थोवेंमुत । यिछि भावनायि प्यठ गच्छि यिमन शाबश दिनं युन ।

शारदा पुस्तकालय

(संभावना शा. दा. क. द.)

क्रमांक 703



कण्ठपोश

(वाखँ सोम्बरन)

श्यन खण्डन मंज़

चमन लाल राजदान

शारदा पब्लिकेशंज

42 - बी / सी, दलपतियां

जम्मू-तवी



पनेनि दिवंगत पतिव्रता
गरवाजिनि श्रीमती नैनसी
राजदान हुँन्दि नावुँ अरपन

तरतीब

न.	शीर्षक	सफँ नंबर
1.	गोढ़कथ	1
2.	दयि अनुग्रह (भूमिका)	3
	<u>खण्ड - 1</u>	
3.	व्यनथ (40 वाख)	5
	<u>खण्ड - 2</u>	
4.	ग्वर्रे-पोश (38 वाख)	17
	<u>खण्ड - 3</u>	
5.	साधना (60 वाख)	29
	<u>खण्ड - 4</u>	
6.	भक्ति-भाव (24 वाख)	46
	<u>खण्ड - 5</u>	
7.	आत्मानुभव (112 वाख)	54
	<u>खण्ड - 6</u>	
8.	विस्थापन (16 वाख)	84

गोढ़कथ

बँ छुस नँ काँह लेखनवोल तँ नँ छुम ज़ाँह ल्यूखमुत । अलबतँ छुम इका-दुका ज़ाँह
कालि लोकँचारस मंज़ मुखतलिफ ज़बानन मंज़ ल्यूखमुत युस काँलेज मैगज़ीनन तँ
केंछन अखबारन मंज़ छापनँ छु आमुत । तथ वनव नँ लिखॉस्य आसुन । म्यानि
सरकार्री मुलॉज्यमतँ मंज़ रिटायर गच्छनँ पतँ ह्योतुन मे कलम तुलनस कुन रुजहान
गच्छुन तँ ह्योतुम लेखुन । यि रूद ज़्यादँतर भक्तिभावस तामँय महदूद ।

भगवान गोपीनाथ जी महाराजनि कृपायि सूँत्य आव केँह भगवानजियस प्यठ हिंदी तँ
काँशरिस मंज़ भजन तँ लीलायि वेंनिथ तिमन पेश करनँ । अँकिस "भाव-पोश"
लीलायि मन्ज़ ओस मे भगवानजियस वोन्मुत ज़ि तोह्य रूज्यतव मे दुहोय वुज़ंनावान
युथ बँ कुनि रंगँ तुहँन्ज़ सीवा रोज़ँहॉ करान । शायद छु यि तमी भावुक लोल ज़ि बँ
छुस ह्यवान ती करुन यि नँ बँ ज़ाँहति ह्यकँहॉ करिथ । तमि लीलायि हुन्द सु बन्द
छुस बँ तोह्यति बोज़ंनावुन यच्छान । सु छु यिथँपाँठ्य :

विज़ि-विज़ि तुहुन्द अनँग्रह, म्वछि मंज़ छिवँ नवग्रह ।
दुहोय रुज़िव वुज़ंनावान, पोश लागोय भावँसान ॥

भगवानजी रूदय मे दुहोय वुज़ंनावान तँ वनान ज़ि केंछा बोज़ंनाव । आसान हिंदी तँ
काँशरिस मंज़ आसनँ किन्य रूद यि स्यठँहॉय कामयाब तँ लूकव कोर पसन्द ।
अथ मंज़ आँस्य केँह काँशिर्य वाख ति । केँह वाख वेंनिथ आव मे ज़ोन ज़ि यि
कूशिश थवव ज़ॉरी तँ किताबि हँन्दिस् रूपस मंज़ करव यि पनँन्यन बन्द तँ बाँदवन
पेश युथ ज़न तिम ति म्यानि ज़िन्दगी हॉन्ज़ि तजरुबँ सूँत्य गच्छन फ़ैज़याब । यिमँवँय
वाखव सूँत्य पेयि यि "कण्ठपोश" नावँच वाख-सोम्बरन थनँ तँ योसँ बँ तोहि पेश
छुस करान ।

सवाल छु वोथान जि वाख क्याह गव ? बँ वनँ वाख छे दिलँच सो आवाज योसँ
पजर चेनँ पतँ दिलँ मंजँ वँथित प्रकट यच्छान छे गच्छँन्य । प्रकट वरनवोल छु
अथ तिथँ पॉठ्य वोनान तँ न्यबर कडान जि बोजनवोल या परनवोल छु अथ दिलस
मंज जाय करान तँ हनाह पनेनिस पानस प्यठ अपनावान ।

वोमेद छम जि म्यॉन्य यि कूशिश लबि पॉन्य पानय पनुन मकाम ।

बँ छुस डा. भूषणलाल कौल साँबुन स्यठाह आभाँरी येम्य यि हटिचमाल वाख-सोम्बरन
हँन्दिस रूपस मन्ज बनावनस मे अथँरोट कोर तँ होसलँ द्युत । सु छु म्योन हमदर्द तँ गमखार ।

प्रो. चमन लाल सप्रू छु म्योन त्वकँचारुक यार तँ अँस्य ब्रड्य सूँत्य-सूँत्य । यथ मंज
द्युत तँम्य ति पनुन योगदान ।

बँ छुस पनेनिस बँडिस साहेबजादस सुरेन्द्र जियस तँ तँमिसन्जि आशनि हँन्दिस बाँयिस
संजय काचरूहस दोछि-दोछि ओँही करान यिमव कंप्यूटर डी.टी.पी. तैयार कोर । बब
भगवान रूजिन यिमन सूँत्य-सूँत्य असि सारिनँय कृपा करान ।

सारिनँय रुत कान्छन वोल

24 नवम्बर 2003

चमन लाल राजदान

107 - डी, पॉकेट - बी

दिलशाद गार्डन

दिल्ली - 110095

दूरभाष - 22136144

22117804

दयि अनुग्रह

(भूमिका)

कबीर सुद्य 'शब्द', रहीमुँन्य 'दोहे', तुँ ललि हुंद्य 'वाख' बे'यि नुंद ऋ'श्यैँन्य 'श्रुख' छि गागरि मंज ज़न तुँ सागर (सदुँर)। ललद्यदि यो'स वाखन हुंज परम्परा कौशरि भक्ति शौथरी मंज शो'रू कॅर सो' ऑस हना ल्वति ल्वति ब्रौह पकाना अमा पो'ज़ यनुँ अर्यैँ माजि कॅशीरि हुंदि फरि तलुँ लंजि रॅटिथ कॅडिथ छुँनिख तनुँ ज़न आयि वाख वननुँच तुँ लेखनुँच परम्परा बे'यि बारससा अथ कारवानस मंज छु नो'व अछुर चमन लाल राज़दाना बुँ ज़ानन राज़दान सौव ल्वकुँचारुँ प्यठुँ ज़ांह बूजुम नुँ यि शौथरी कराना हरगाह करान ति आसि हे मार्कस मंज ओस नुँ वनाना यो'त वौतिथ सपुद अँमिस ग्वरुँ सुन्द अनुँग्रहा वुन्युस तान्य लीखिन यिम किताबचि - भगवान गोपीनाथ जी संक्षिप्त महात्म्य बेयि तिहुँन्दय अनमोल वचन, बब भगवान चालीसा, क्षमा अष्टक तुँ नागडंडी चालीसा। अमिय सिलसिलुँक कोर' छु कण्ठपोशा यि छि राज़दान सौबुँन्य सौदुँरवार रचना - वाखुँ सो'म्बरना यिम छि व्यनथ (ऑर्रर), ग्वरुँ - पोश (ग्वरस पान पुशरुन), साधना (तसुँद्यन पादि कमलन लोर ऑसिथ दयि सुँजि वति पकनुक सफर), आत्मानुभव (चेनुँवन) तुँ ऑखरस विस्थापन (गरुँ रावुन - ऑल्यनाश)।

पननिस मौलिस कण्ठुँजुवस तुँ मातायि पोशिकुजि हुन्द्य ऋ'श्यैँ सन्तान चमन लाल राज़दान सौबन छि यिम लौव्य तुँ सौदुँरवार वाख तिम्नुँय "कण्ठ-पोश" नाव दिथ अर्पण कॅर्यमुँत्या।

राजदान सौबन छि वुमरि नोकरी कर्मुच, कर्मयूगी सुंद कर्तव्य
निबोवमुता गृहस्थ चलोवमुत अमापो'ज यि ज़ोनिथ जि - "बेस्ती मंज
वनवासुँय रोज़"।

म्योन्य छस ओही जि बबे सुँज वॉणी - स्यजराह, पजराह तुँ
शो'जराह वरतौविथ ओस्यनस ओ'रजुँव तुँ दो'र को'ठा शारदा मातायि हुंज
दया ओस्यनस तुँ रूँत व्यचार लेखनुँ बापथ कॅर्यनस प्रथविजि अथुरो'टा

मोजहोर जुनुँ पछि काह
सप्तर्षि - सम्वत्, 5079
(मोक्षदा एकादशी,
गीता जयन्ती)

(प्रो.) चमन लाल सपुर
सम्पादक
कोशुर समाचार
दिल्ली

खण्ड - 1

व्यनथ

ॐ

व्यनथ

मौज हारैमाल वनान नाराण जुवस
माजि द्युत संतान ज़न तैं शिवनाथ
यिहय छुय सालिग्राम गूपी ह्युह
तवय थावोस लोलैं नाव गूपीनाथ ॥ 1 ॥

नावि छुस लमान भवैसागरस
तारनवोल छुम पानैं भगवान
तारान वोनैनम नाराण बबसैय
मौज हारैमाल मंगान रुत ज़गतस ॥ 2 ॥

आरती करान तैं लोलाह बरान
परान सौरी ग्वरैं गीता
बुछुम संमोख पानैं भगवान
दर्शुन दिवान करान अनैग्रह ॥ 3 ॥

छि लारान योर यिवान सौरी
अथन क्यथ पोश ह्यथ डौली
करान अर्पन छि भगवानस
मंगान छिस तार कूठ सेंदरस ॥ 4 ॥

छुख दयालू पानें दयानिदान
छि थिम चॉन्य पाद न्यथर शूभान
यूगियन हुन्द चें यूगीश्वर
निश-पोंपियन हुन्द चें बब भगवान ॥ 5 ॥

रैटिमय मे पाद बोजुम फरियाद
गोय ना कनन चे म्योन नाद
वनान छुसय बबें दितें मे तार
चठतम रजें-गन्ड म्वकलावतम ॥ 6 ॥

लालो हा बबें लालो वन्दयो लाल
लाल छुय ट्योक तय लालऽय नॉल्य
लालऽय ओसिथ टोठ छुख लाल
चारें कर सोन लालें मन्जें लाल ॥ 7 ॥

नाद गोम कनन तय भास्योम बब
छोन्डिथ छोन्डुम म्यूलुम न केहं
अडेंरॉच ध्यानस दर्शुन होवनम
वोर्नेनम बब छुस भक्तयन हुन्द ॥ 8 ॥

दून्याह ज़ोलिथ वेलिथ पान
अँगनस बावान दो'ध तय ग्यव
बबैय ओसिथ, बबैय लोंगिथ
बबन रोछँनस पादन तल ॥ 9 ॥

बबन परजनुस अकी नादय
वादय ह्योत्मस अकि पतें ब्याख
मनेच शॉन्ती तें ग्वरें भक्ती
शक्ति आयम तें वौपदेय वाख ॥ 10 ॥

कूठ संसार तय म्यूठ छुस रस
येम्य ज़ोन पानय तैस्य आव ह्यस
दकें दिथ त्रोकुन, प्रोकुन यूग
भगवान ज़गतुक तें म्योन छुय बब ॥ 11 ॥

अनुभव करिथैय फेरिथैय गोम्
थपि न्यूनम लूभ अहंकार
मावजें कने भक्ती दिचेंनम्
लोलाह गन्योम तस बबें लालुन ॥ 12 ॥

चिलिमाह जौलिथ, खौरिथ ज्यूत्य
भगवान मीलिथ ब्रह्मस सूत्य
दारि-वर खूलिथ प्रारान तस
यस बौविथ पनेनुय हाल वोनून ॥ 13 ॥

भगवान जौनिथ, भगवान मौनिथ
भगवान वोनहस इहें लूक्य
भगवान ग्वरें-रूपें त्रैयन हुन्द रूप
भगवान सोनुय छु गोवस्थन ॥ 14 ॥

युस आव दरबार अहंभाव त्रौविथ
सौविथ थौविथ मोह तय लूभ
भगवान वबेनेय द्युतनस दर्शुन
वर्शुन कोरेंनस वरदानव सूत्य ॥ 15 ॥

बव छु वनान कुनुय छु दय
तस निश सौरी हिवी तें कुँव्य
आसुन, बसुन तें संसकार
यि छु तिहिन्द्यन करेमन मंज ॥ 16 ॥

प्रारान रूदुस तिहेंन्दिस नादस
वॉन्साह गॅयि तें म्यूलुम नाद
नादें वोल भगवान वडिनथॅय गोम
स्व-मनें भक्ती प्रावख फल ॥ 17 ॥

ज्ञानें गंगायि मंजु गोतें दिवेंनावतम
सोरेंनावतम तेंथ्यमंजु पनेनुय ध्यान
क्रूधस सूँत्य-सूँत्य अज्ञानें मूलन
द्रातिरूपें वाखें सूँत्य करतख नाश ॥ 18 ॥

नाव हेय-हेय नावि छुस लमान
नम छुम रोटेमुत ववे भगवानन
क्रूख दिथ वानेनम यथ तूफानस
नाव तरि पानय क्रूठ सेंदरस ॥ 19 ॥

ढखेंवैन्य लूराह सूँत्य पकॅनॉवम
सूँत्य-सूँत्य रूजॅम प्रथ कदमस
तिथय पॉठ्य सतगॅवर सूँत्य छुम पानस
विजि-विजि रॉछदर बब भगवान ॥ 20 ॥

नखि छुम, डखि छुम, सूँत्य छुम पानस
रौँछ्य-रावठ बेयि सायि छुम तैमिसुंद
नालैमति रटेंहन होल छुम गोमुत
पादन मौँन्य-मीठ्य बब छुम आसवुन ॥ 21 ॥

ध्यानै मन्जै बौवनम ज्ञानैच कथ
मो त्राव सुमरण मनै मन्जै दूर
वौथैवुन तै बेहवुन तैमिसुन्द ध्यान
जीर छुम दिवान पानै भगवान ॥ 22 ॥

नाद आम वबैसुन्द आश्रम वातनुक
वौतिथ प्रोवुम नोवुय अनुभव
ज्ञानस सूँत्य-सूँत्य भक्ती दिचनम
मन छुम नै मानान फेरुन पथ ॥ 23 ॥

दर्शनस बबैनिस सौरी लारान
प्रारान रटेंस गुरु-प्रसाद
मनिकामन छख सारिनैय मेलान
वातान दौख लूभ सौरी अन्द ॥ 24 ॥

आनन्द वुछहॉ न्यत्रव पनैन्यव
कनव बोज़हॉ अमृत नाद
जेवि सूँत्य करहॉ वखनय नावस
बबै म्यानि अँथ्य सूँत्य पूज़ा चॉन्य ॥ 25 ॥

प्रान्यन पलवन रंग दिवैनावान
नव्यन बानन बठै कडनावान
बब भगवान छु शूभरावान
प्रान्यन तै नव्यन सम्भावै सूँत्य ॥ 26 ॥

ज़नमाह दोरुन तै मोरुन क्रूध
तँथ्य सूँत्य लूभ, मोह बेयि अहंकार
गरँबार त्रॉविथ, प्रॉविथ तस
यस सूँत्य रूज़िथ बन्यव भगवान ॥ 27 ॥

बबस मँन्जिम कुनी कथ
सथ छम चॉनी हावतम वथ
लथ दिथ त्रावहॉ आसुन बसुन
मथ छुम गछान लोतुँय रोज़हॉ ॥ 28 ॥

भक्तत्यन पनैन्यन अज्ञान हरतख
शौद्ध व्यचारन सूँत्य ज्ञान दितख
दोनि हुन्द बेयि प्रकाश त्रावतख
बबेँ अहं त्रावुन सोऽहं वनतख ॥ 29 ॥

बबन द्युतनम कुनुय वरदान
चे मालि पूशनय म्योन प्रसाद
सर नोमैरौविथ कोरमस प्रण
करेँ आदर सारिनैय ग्वरेँद्वारस मंज ॥ 30 ॥

ज्ञानैक्य चऽग्य वति-वति जौलिथ
प्रकाश जौतनावतख अनेँग्रहेँ सूँत्य
अज्ञानेँ रूपी अनिगटेँ कासतख
दिशा हावतख बबेँ पानस कुन ॥ 31 ॥

अज्ञानेँ-मल छलतख ज्ञान दितख
पजरस कुन वथाह हावतख
पजरुक अपज्युक म्वल भासनावतख
बबेँ भक्तियन पनैन्यन मिलचार थावतख ॥ 32 ॥

गूरै-गूरै करहौ ग्वरै जानानस
भगवानस वन्दहौ मन तय प्राण
शुहुला त्राविहेम ओखरी समयस
दयै नाव रोजिहेम मनैसैय मंज ॥ 33 ॥

पूजा तैमिसैन्ज विजि-विजि करहौ
जपैहौ मनै मऽन्ज्य जपै माला
ध्यानाह दोरिथ, अँछ मुचरोविथ
संमौखै वुछैहन बब भगवान ॥ 34 ॥

मनन दोपनम सफरसै नेर
सफराह भास्योम कूठै खौतै कूठ
दोहै अकि लँबैम छोटैय वथाह
सेदि-स्योद वुछुम बब भगवान ॥ 35 ॥

स्यजरा, पजरा बेयि श्योजरा
बबन वोर्नेनम यिमय अपनाव
यिहय छय वथ तोर वातनस
तति पानय वुछिहन हरगूपाल ॥ 36 ॥

ओनाह वुछुम पकान स्योदुय
व्योदुय भास्योम वतन सँत्य
अँन्दरिम प्रकाश न्यबर त्रावान
यिथी गाशि तारिहे मेति भगवान ॥ 37 ॥

ग्वरँ-पूजा तय ग्वरँ-ध्यान
यिम छी नावि-वॉल्य नावि लमान
नाव लगि बँठिस बँति लबँ तार
सतगँवर मेल्यम पाने भगवान ॥ 38 ॥

यी वोनँनम ती मे कोरुम
गोरुम नवि सरँ पुनन पान
जान द्युतनम पजि वति लोगुम
बूजुम सतगँवर छु पाने भगवान ॥ 39 ॥

भक्तियन अर्थरोट सथ छख चॉनी
जगतस रुत-फल दया छख चॉनी
स्यद्धपीठ आश्रम पछ छख चॉनी
बबमोल आसवुन माय छख चॉनी ॥ 40 ॥

खण्ड - 2

ग्वरँ-पोश

5061

101-101

ग्वरें - पोश

अनिगटि चॉन्गिस गाश प्रज़लान
जून् पछें जून गाह त्रावान
यिथय पॉठ्य ग्वरेंदीव अनिगटें कासान
बासान कोहें प्यठें सिरियि चमकान ॥ 1 ॥

अँछ वछें ओसिथ ओनेह लोगुम
कनन भास्योम ज़र प्योमुत
ज़ेवि दोपुम ज़्यवल में बन
अदय म्यूलुम ग्वरें वोपेंदीश ॥ 2 ॥

मोहचय-मालयि नाराह दिमँहों
छैतें करेहॉन छटेंवेनि अशिदारि सूँत्य
तमि पतें ग्वरेंस लोलाह बरेंहों
यिथेपॉठ्य सुदामा न्यथनोन द्राव ॥ 3 ॥

वॉन्साह गॅयम ग्वरेंस प्रारान
छांडान कोहन तें बालन प्यठ
भास्योम वुम्बेरें ज़ायि मा करेंम
गरेंम लॅराह हवाहस मंज़ ॥ 4 ॥

प्राण हय दितिनय प्राणैय नाथन
प्राण वन्दिजिहस पादन तल
प्राण हय रोजी पानय सोजी
सतग्वर वाती न्यत्रन तल ॥ 5 ॥

अपजिस टख दिथ पजराह वनेहो
दयिसुन्द दयिनाव भयि ह्यथ स्वरहो
मने मन्ज्य मनसैय लोलाह बरेहो
अन्दरी ग्वरे दीवस वैन्य दिमहो ॥ 6 ॥

लोलाह बरेहो गुरुहस पनेनिस
हूरिथ ह्यकस ने दुम्बैय तय हार
गोडैन्युक ग्वरे छुम मोल तय मौज
तिहन्दिन पादन तल हरद्वार ॥ 7 ॥

वतिकिस टाटस कुन थव जोऽन
सासबैद्व पकान ते लते मोन्ड करान
अभिमान त्राविथ राहत सारिनैय
ग्वरे मोखे वोनैम यिथुय बन ॥ 8 ॥

मन छुम चन्चल ठहरान नॅ केंह
नेरान लोति-लोति फेरान वति-वति
ग्वॅरस प्रुछुम मन नो डन्जे
म्वेछि मन्ज रॅद्य-रॅद्य कर अभ्यास ॥ 9 ॥

यी वनि ती वनि ग्वॅर वनि पानय
असि छा वनेनुक ज्ञान
मुखस, ज्ञानिस बेयि अज्ञानिस
त्रेशेवन्य गन्डि सु अडिकसेय गोजिह ॥ 10 ॥

ओनाह वुछुम गाशि रोसुय
पकान वुछुम सेदि स्योदुय
लोरि वुछुम ह्यवान कॉम
ग्वॅर वनि मेति यिहॉय लूर ॥ 11 ॥

ग्वॅरस वोनुम ग्वॅर क्चाह गव
वापस वोनेनम वतँहावुक
वथ छम जीठ तय छोटरावतम
अमृत चॉव्य-चॉव्य वातनोवनस ॥ 12 ॥

गरि द्रास सुबहन ग्वेँ दर्शनस
मीलिम स्यठाह तें ग्वेँ नें काँह
ग्वेँ छुनेँ श्रोग-श्रोग मेलान सारिनैय
यस मेलि तस छुय दयि अनेग्रह ॥ 13 ॥

ग्वेँ छा लायक ग्वेँ वनेँस
ग्वेँ गछि आसुन ब्रह्म स्वरूप
ग्वेँ छी मेलान वति-वति फेरान
ग्वेँ छुय त्रैनुन्द कुनुय स्वरूप ॥ 14 ॥

ग्वेँरन येलि अनेग्रह कोरेँनम
वोनेँनम यि गव करेँ चापुन
मौखेतय ज़ानिथ वटुन शबनम
बुजेम पानय दयि सैन्ध नाव ॥ 15 ॥

दो'ध बोविव अमिसूँत्य प्रोविव
पोश लॉगिव नरमेँय बेन्यिव
कंद बोविव कंद्य बेन्यिव
अहं त्रोविव सोऽहं प्रोविव ॥ 16 ॥

ज्ञानाह बूजुम रॉत्य रातस
यादाह रूदुम नें केंह
साथाह वुछुम ग्वॅरस मेल्लेंनुक
मीलिथ वोर्नेनम कुनुय वचुन ॥ 17 ॥

माय त्रॉविथ माय मॅशरॉविथ
माय थव कीवल सद्ग्वॅरस सूँत्य
सुय छुय रॉछदर बारम्बार
सूँत्य-सूँत्य पानस वतें हावुक ॥ 18 ॥

येन्दिरयें पॉविथ, लालसा त्रॉविथ
सॉरिथ करमय यूग्वय फल
ग्वॅर वाख पॉलिथ, सुमरण दॉरिथ
तृष्णा मोरिथ मेलख तस सूँत्य ॥ 19 ॥

श्रद्धायि हऽन्द्य पोश थॉविम चॉरिथ
यियम तें लागस भावेंनायि सान
अथन तुलन तें फेक्कयन भरन
मान्यम योर्देवय बनन ग्वॅर ॥ 20 ॥

जहालत, रज़ालत बेयि अदालत
छम नें यिमन सूँत्य लडनँच महारत
ग्वॅरन लोगॅनस पज़रॅचि क्रियाये
मेलान अमृत मे अमि भावनाये ॥ 21 ॥

अहंभाव त्रौविथ, यिहोय ज़ौनिथ
मौनिथ मोथ छुम पद्व्येन तल
व्यनथ करॅहौ पनॅनस ग्वॅरस
दयॅनाव स्वरॅहौ पौनभस शाहस ॥ 22 ॥

ब्योलाह वॅविथ तें पोशाह नीरिथ
बागवान सगॅवान बरान लोल
तिथय पौठ्य फोलॅरान ग्वॅर तस भक्तिस
मीठ्य युस करान पादन तस ॥ 23 ॥

अमृत चेय-चेय अमृत वुज्योम
अमृत बन्योस ग्वॅर दयायि सूँत्य
अमृत वऽन्य-वऽन्य अमृत प्रोवुम
अमृत सपद्व्योस ग्वॅर कृपायि सूँत्य ॥ 24 ॥

पाठ तय पूजा वौन्य गव स्यठा
पूजा गऽयि वौन्य गुरुहस पनेनिस
ध्यान कर तेमिसुन्द मनेसैय अन्दर
सुय छुय त्रैन हुन्द मूलाधार ॥ 25 ॥

ग्वेस ते शिष्यस कुनुय रिस्ताह
सनि खोते सोन तय थदि खोते थोद
जीव जोराह कुनुय आत्मा
कुनी वथा ते ब्रान्दाह कुन ॥ 26 ॥

मोल मेशरोविथ तय ग्वे प्रोविथ
रोपे देछि मोनुय मोलुय ग्वे
माधव धरन वथा होवऽस
रोपे देछि प्रोवुय रोपे मन्जे सोन ॥ 27 ॥

फिकिरा त्रोविथ भंय मो थव
लय थव पनेनिस ग्वे दीवस सूत्य
पजरेचि वति पख काँह नो डाली
प्रछेनस देह छी मदतस अख ॥ 28 ॥

सत्गर्वे चोनि सत्कर्मस मन्ज
सत्त्रयियन हुन्द सत्सम्वाद
सत्चित आनन्द सत् आनन्द
सत् येम जोनुय सुय सत्त्रयोष ॥ 29 ॥

सुबहन ते शामन दोहस ते रातस
छुस पनेनिस गवे ध्यानस मन्ज
लोत हार भासान पान पनुन छुम
च्यथ कचि, मन डोजि, शान्त व्यवहार ॥ 30 ॥

वति प्यठ म्यूलुम नफरा अख
नजराह त्रौवनम हेरि प्यठे ब्वेन
वुछनस मन्ज ओस भासान अन्जान
गवेरन सूजेनय तारनबोल ॥ 31 ॥

गवेर ध्यान दोरुम मनेसेय मन्ज
मने मन्जे न्यबर त्रौवुम ने केन्ह
गडिथ थोवुम टिकलिस सूत्य
खयेनाह द्युतमस दोहे वादन ॥ 32 ॥

मॉलिस माजि अपमान करुन
दसतारस ज़ीर दिन्य परमदीवस
ग्वेरेदीवन हेंन्जि अनैवारि मन्ज
मॉलिस माजि प्यठैकनि जाय ॥ 33 ॥

सतैव वथ तै सत-साधना
सत-पूजा छे बारम्बार
सतैय छु सतग्वैर आसनवोल
गटि हुन्द गटैजोल गालनवोल ॥ 34 ॥

ओंमैय दोरिथ मन श्रोमरोविथ
ग्वैर सुन्द रूढुम ग्वैर अनैग्रह
अऽथ्य मन्ज ह्योतुम अन्दरी अचुन
तति दय म्यूलुम गरुडस प्यठ ॥ 35 ॥

ग्वैर शब्द तै व्यपन बानै
यस नै आसि सु क्याह रटि
बानै ओसिथ रटन वोल
शेरि आसि तै पानय मेल्यस ॥ 36 ॥

करमैचि करैमय भूमी मन्ज
करैमस म्योनिस दिवान फ्युर
त्रोवुम कर्म तस पादन तल
सद्गर्वै लेख्यम नऽव कर्मलीखा ॥ 37 ॥

तमस प्रकाश अपैजिस पज़र
सिरियि प्रवै च़टान अनिगटि मूल
पापन क्षय, दयै नावै सूत्य
ग्वरै दीव म्योन अंधकार गालान ॥ 38 ॥

खण्ड - 3

साधना

साधना

तन नाव दहि लटि मन नो प्रेनिये
मन नाव अकि लटि तन छय जान
मन नौविथ मन म्वेछि मन्जु रठतन
यिथय पौठ्य मेली पाने भगवान ॥ 1 ॥

क्रकॅनाद लौगिथ दय नो मेली.
दय छुय प्रथविजि पानस सूँत्य
दयेंसुन्द नाव छुय मने मंज्य स्वरनुँय
अँछ वछँ औसिथ अँन्य पँक्य कूँत्य ॥ 2 ॥

ओँगैजि गज्यम माले फिरान
होट लौगुम क्रकॅ दितान
पाद छेनिम दयस छांडान
दय वुछुम पते पनेनुय पान ॥ 3 ॥

मन्दर, मशीदय क्याह करन
फरन जगतस सुबेह शाम
दय टोठान स्यजरस ते पजरस
मो कर अपेजिस लोलें मते लाय ॥ 4 ॥

स्यजस, पजस खुर नो यिये
अपेजस पेजरावुन छुय अपकार
वपेकार केस्य-केस्य पुण्याह प्रावख
पापशाप मेलनय पीडा दिनैस्ये ॥ 5 ॥

सोखस तें दोखस कुनी नजराह
पजराह नेरी अमी मन्जय
पनेनिस तें परेदिस ह्युवुय वरताव
स्येजराव मन अमी डन्जि ॥ 6 ॥

बुछिथ लाग ओन तें बूजिथ जौर
छोपे-छोपे करिथेय स्यदेह-मोल बन
यिहोय प्रोविथ यिहोय जीनिथ
तेलि मालि वातख अमरनाथ ॥ 7 ॥

प्राणस दप्योम प्राण कति छिय
वापस वोर्नेनम वानस प्यठ
दमह सून्चिथ च्यथ मे दिचम
प्राण छा शूबान वानन प्यठ ॥ 8 ॥

कथाह वनय वारें थव कन
मे ना वुऽम्बरि सौरुय दय
अथें छुस मूरान मे क्याह कोऽरुय
यिनेबा चैति यिथुय करख ॥ 9 ॥

जिन्दय ओसिथ म्वरदें लागुन
ओकॅल ओसिथ बेकॅल बनुन
मजय ओसिथ मजय त्रावुन
तेली तगी दय परजॅनावुन ॥ 10 ॥

द्रोताह दिमॅहॉ नफचस पनेनिस
खयोऽन-च्योऽन दिमॅहॉस द्रोकि लायक
तमाह मो कर सौरुय अपॅजुय
त्रावतो सौरुय जिन्दें पानय ॥ 11 ॥

हुपॉर्य, यपॉर्य, चोपॉर्य छोंडुम
पाद फोलिम तें लोबुम नें जॉह
अकऽय विजाह यिथुय मीजिम
त्युथुय वुछुम पनेनिस पानस मन्ज ॥ 12 ॥

नाराह दिमेंहों आसनस तें बसनस
दूरि-दूरि वुछेंहोंस सूर किथें गोस
लोटुय आसिथ लोटुय मरहों
लोटुय तरहों कूठिस सँदरस ॥ 13 ॥

दूपाह ज़ोलुम ज़ेठि खोतें ज़्यूठ
म्वचराह थोवमस बून्याह ह्यू
देहा वोथुस ओबराह ह्यू
मनें किन्य वलिथेंय मायायि मंज ॥ 14 ॥

लसुन तें बसुन रिशतन मन्जेंय
मनें मँन्ज्य रिशतन वायुन द्रोत
पनुन पान अमिनिश अलग थाँविथ
यिहेंय छय सेदि-स्योद वातेंनऽच वथ ॥ 15 ॥

लूराह दिचेंनम ढ़खेंन्य किचेंय
सूँती वोनेंनम ह्यसय रोजुन
मे छा खबर लूरेंय तार्यम
ज़िन्दय वन्देहस प्राणेंय पादन ॥ 16 ॥

पनेनिस पानस म्वेल मो खार
यि छुय वलिथेय मेचि अम्बार
म्वेलवुन चीज छुय पानसेय अन्दर
सोंदर मन थव सोने सुन्द मन्दर ॥ 17 ॥

ज्ञान येलि म्यूलुम ह्योतुम वनुन
वनुन गव ती लूकन श्रपुन
लूकन वैन्य-वैन्य फिक्रि तारुन
पनेनुय पान छुय ईश्वर जानुन ॥ 18 ॥

शौद्ध थव मन तय बौद्ध प्रावख
मो थव सूती द्वयत-भाव
अकोय छुय ते अकोय जानुन
मान यि छुय प्रथ जीवस मन्ज ॥ 19 ॥

स्वने-संज हेर तय स्वने-संज लव
स्वने ज़न चमकान गरेंच गरेंवठ
दयन हय द्युत्नम तोगुम ने सम्बेलुन
अँक्य अहंकारन कोरुस डुबेडास ॥ 20 ॥

जनेम मोकॅल्योम धने-द्वार सोम्बरान
मे नो सूंचुम नेख्यम नॅ केह
आयम वॉणी रोज़ दयनाव सुमरान
करसों जमह तें पोशी स्यठाह ॥ 21 ॥

गूर वनान दौध बॉविव
पुश वनान पोश लॉगिव
वोन्य वनान कन्द बॉविव
मॉज वनान अहं त्रॉविव ॥ 22 ॥

दून्याह जॉजिम मंज मॉदानस
अॅन्द्य-अॅन्द्य सम्योम लूकॅ अरसाथ
छोपॅ-छोपॅ करिथॅय लूख व्यसरोविम
भगवान छांडनस छा हावभाव ॥ 23 ॥

लोलॅक्य तें प्रेमॅक्य बंद बोर्जॅनोवुम
भार्वॅक्य लॉग्यमस पोशि अम्बार
त्रेशणा मॉरिथ, अहंभाव त्रॉविथ
आयतन थोवॅमस पनुन पान ॥ 24 ॥

सन्यास दोरिथ प्रोवुम थुने
छोन्ड्य-छोन्ड्य छोन्डुम लोबुम नें केह
ग्रहस्थ पोलुम तें ध्यानाह दोरुम
अमी मन्जेंह लऽबुम सतेंची वथ ॥ 25 ॥

मनेकिस सेंदरस छौंठ वायनावतम
गोडें हेछिनावतम छान्ति हेंद्व्य छल
अथ सेंदरस मन्ज दून्याह दिमेंहो
अति मा आसि म्योन परमीश्वर ॥ 26 ॥

मनेके चान्गि सूल्य छोडुम दय
छोन्ड्य-छोन्ड्य म्यूलुम आध्य-प्रभातस
दर्शुन कोरुम तें मन गोम शाद
छेनेहें गोस जालें निश कऽदें मन्जें कऽद्व्य ॥ 27 ॥

कूध त्रौविथ शान्त बनुन
शान्त बेनिथ अज्ञान त्रावुन
वॉरस दकें दिथ लोलाह बेरिथ
प्रकाश वहेरिथ गाश अन सारिनैय ॥ 28 ॥

डूराह गोंडुम मन मॉदानस
प्रेमुक वोवेंमस पोशय ब्योल
पोश फोलिस तें फुलयाह द्रायस
लॅन्डाह-लॅन्डाह नियख पानस सँत्य ॥ 29 ॥

गोडें-गोडें खँतिम नें फलख फिक्री
अदें क्याह बोजहों सन्त क्याह गव
वोनहम सारिवेंय दयिनाव स्वर
अथें मन्जें नीरिथ प्योस पायस ॥ 30 ॥

छोपें दम कॅरिथेंय लोलाह बोरमस
भगवानस कुन दॅरिथ ध्यान
कथा चेंटेंम खयन-च्यन मोशरुम
खँटिथ थोवुम नियस मा काँह ॥ 31 ॥

परमधामस कुन द्रास सफ़रस
वोर्नेहम वतें छय स्यठा दुशवार
कऽम्य ताम वोर्नेनम अँन्दरी नेर
छोचि वति वोतुस परमधाम ॥ 32 ॥

मॅग्य-मॅग्य मंगान परम दीवस
करतम पूरँ दिल्लेक्य अरमान
पजरँचि वति प्यठ फोलवॅन्य टूख्य
लबिकुन त्रोंविथ जगत्तैक्य भूग ॥ 33 ॥

आतम जॉनिथ परनाह प्योसस
गरि-गरि वोनेमस चुँय छुख थोद
सरखम करिथॅय अनेग्रह मोंगॅमस
तैथ्य सैँत्य रुतफल जगतस क्युत ॥ 34 ॥

चोक् तय मोधुर यकजा चालुन
चालुन लूकन हुन्द दुर-व्यवहार
चालान चालान युस द्राव अमिमन्जो
सुय छुय पॅज्य पोंठ्य वोतैमुत सन्त ॥ 35 ॥

अशौद्ध त्रोंविथ नपे-नपे करान
वेचार वोथान वुजान ज्ञान
मनस शॉन्ती आनन्द लबान
बूगॅ हॉन्कल्ले फुटिथ यिवान ॥ 36 ॥

ध्यानाह दोरुम मन ठहरोवुम
 सत्गर्वे रोदुम साक्षात पौठ्य
 न्यबेरिम हवा न्यबेरी वुड्यव
 अन्दर द्युतमस नै अचने जाँह ॥ 37 ॥

सोरुय त्रौविथ पान मोक्कलौविथ
 सौविथ मन तय प्रौविथ दय
 अरज्जथ पनैन्य अनैग्रह तसुन्द
 औसिथ म्युल गोम शिन्याहस सूँत्य ॥ 38 ॥

बुडैह नय छुख मुडैह मो लाग
 मुडैह नय छुख स्योद मो बन
 स्योद नय छुख चोर मो लाग
 ध्यान कर तेमिसुन्द सुय दयावान ॥ 39 ॥

गरै-गरै फेरान गरै नो म्यूलुम
 गरै म्यूलुम पतै पानैसुँय मन्ज
 अँन्द्य पँक्य छौन्डिम लोबुम न काँह
 सौरी आवैस्य मन्ज व्यवहारस ॥ 40 ॥

मनेचे लरि मन्ज जायि वफूरा
वाशाह कोडुम ज्येठि खोतें ज्यूठ
चॅल्य-चॅल्य रऽट्य-रऽट्य अति बेहनोवुम
वासाह कोरुम गर-भरें दूर ॥ 41 ॥

मने पोश चोरिथ शेरि लागुस
आही मन्गुस जगतस किछ
अन्दरी-अन्दरी पूज करुस
न्यबरी बास कॉन्सि मो दि ॥ 42 ॥

ध्यानस तें ज्ञानस ठानें मो कर
मने किस वृषभस हटि कर रज
चंचल आसिथ बरुन कलायि
यिहोय गव मरुन तस पादन तल ॥ 43 ॥

जोगिथ, लोगिथ बेयि बाॅगराविथ
त्रेनेवॅन्य ग्यँड कर बालायि ताख
ध्यान कर तैमिसुन्द प्राण ह्योर खोरिथ
शाह बोऽन वोलिथ लोचॅराव पान ॥ 44 ॥

जन्म दोरिथ जन्म रथि खार
छोब्य मो कर जन्मच वॉन्स
लाल्च, घृणा तें ब्वेछि गोलिथ
मोक्कलाव पान यमी जन्मय ॥ 45 ॥

ध्यानस, ज्ञानस बेयि ईशानस
त्रैनेवैन्य ग्वड भर अशि जलं सूंत्य
मूल चठ मानस वायुस द्रोत
अदय मा प्रावख पनेन्य पहचान ॥ 46 ॥

अँछ जोराह दिचेंमचें वुछनें बापत
दोऽर-नदोऽर यी छु वुछुन
त्रेयिम न्येथराह दोशेवैन्य मन्जस
खेटिथेय रूजिथ खेटिथेय वुछुन ॥ 47 ॥

कॉमाह करेन्य तें कामिहुन्द फल
यि छुनें कॉन्सि अथस तल
कॉमाह करेहो अथरोट करिथेय
दयस मंगेहो सेदि-बुथि तार ॥ 48 ॥

अँक्य कँर मेहनत बेय न्यू फल
लोऽड सिपँहन तय लकब सरदारस
दयि-वति पकँनस हिसाब छुय पूर
यीचाह मेहनत त्यूतुय फल ॥ 49 ॥

ओंम छुय बोड वतँहावुक
तथ अनिगटि मन्ज़ गाशस कुन
अँन्यन छु यिवान ज्ञानुक ज्ञान
अनपढ़ ओसिथ बनान विद्यमान ॥ 50 ॥

प्राणस अपानस क्याह छु सम्बन्ध
दूनि तँ अँगनस कुस करि ब्योन
शिवँस तँ शक्ति कँम्य कोऽर म्युल
चँति मेल पानय शिन्याहँस सूँत्य ॥ 51 ॥

पोशँ-बाग फोलँमुत वुछान बागवान
सृष्टि वोपँदोविथ जगतस पालान
स्यज़र, शोज़र, पज़र यछान भगवान
असुरन सम्हार राक्षसन गालान ॥ 52 ॥

छॉन्ड्य-छॉन्ड्य छांडान छांडुम नें केंह
लॅव्य-लॅव्य लबान लोबुम नें केंह
पूज्य-पूज्य पूजान पूजुम नें केंह
मनॅ मॅन्ज्य सोऽरान त्रोबुम नें केंह ॥ 53 ॥

गरॅ रूपॅ बोमब्रन बंऽ-बंऽ कोरॅनम
चेनॅवॅन्य दिचनम कनसॅय तल
अन्दॅरी गरॅचय रजॅ चचिनम
न्यॅबरी रूदुस गरॅ-भोरी ॥ 54 ॥

रचि-रचि, पीति-पीति, चूरि-चूरि
सोम्बराव अम्बार रॅत्य कर्मन हुन्द
रॅत्य कर्मन सॅत्य निष्काम भाव
यिहोय छुय सार गीतायि हुन्द ॥ 55 ॥

तारॅबलॅ तार दिथ तोरनस अपोर
कनॅ-शेच्छ बॉवनम वथ छय स्योद
मन्ज वति वॉतिथ म्यूलुम सुय
अथॅरोट कोरॅनम अन्द वोतुस ॥ 56 ॥

पजॅरस वोदबव, अपेजिस नाश
 पजॅरस बरकथ, अपेजिस रय
 पजॅरस संचय्थ, अपेजिस विनाश
 पजॅरेंच वथ रटॅनोवनस तॅम्य ॥ 57 ॥

गौतें दिथ सडॅरस मोखतें छु मेलान
 मील्लिथ सपेदान छि मालामाल
 ब्रह्मकिस सॅदरस गौतें दिथ वुछॅहों
 तति मा आसि म्योन रतन तय लाल ॥ 58 ॥

मनॅ-मॅन्ज्य मनॅपोश अर्पन करिथ्येय
 च्यथ डन्जि थोविथ डालुन नॅ केह
 ह्यस होश पनॅनी कलपेठ्य आलवॅन्य
 तेलि दय बोजान आलव तें नाद ॥ 59 ॥

संचय्थ करितव रॅत्य करमन हॅन्ज
 मतें गोबॅरॅव्यतव पापव पान
 सौय संचय्थ सॅत्य पकॅनोविथ
 ओही करॅनव पकॅनावन वॉल्य ॥ 60 ॥

खण्ड - 4

भक्ति-भाव



भक्ति-भाव

सोम्बरान सोम्बरान सम्योम नैं केहें
परान परान लास्योम नैं केहें
छान्डान छान्डान म्यूलुम नैं केहें
दोहैं अकि अनेग्रह पानय कोरनम ॥ 1 ॥

भगवान वनान मे कर याद
मकर हुपौर्य, यपौर्य वखेंत बुरबाद
मोक्कैलैविथ सारिवैय पापव मन्जय
प्रावख मोक्ष येमी जन्मय ॥ 2 ॥

अमी चूरन चूराह कॅरनम
चूरे न्यूनम अहंकार
वदान वदान शोराह कोरुम
यिनैं बा दयि-राग निहम चूरे ॥ 3 ॥

गरि द्रास अमि आशि मेलैहौ यारस
बावस पनेनी दौख तय दौद्व
वथ्यै रौविथ वथ रावैरौवनम
हौवनम वथ पय नय कोन्सि ॥ 4 ॥

लबान लबान लोबुम नें केंह
रावान रावान रोवुम नें केंह
लबुन तें रावुन कुनी कथाह
गथाह करेंहों अवतारस प्यठ ॥ 5 ॥

ध्यानैय दोरिथि रोटुम मनैस मन्ज़
खोटुम पनेनिस मनै-मन्दरस मन्ज़
पहरें द्युतमस दोहन तें रौचन
चलैनस दिचैमस नें वथ कुनिकुन ॥ 6 ॥

केंछन खवश करान मंगुन
केंह हय दिन तें खरान खयो
पोऽछ छुय परमात्मा ज़ानुन
पाद छलुस तें मनस बरुन ॥ 7 ॥

मनेकिस बागस ब्योलाह ववैहों
लोलें अमृतें सूँत्य दिमैहोंस सग
पोश फोलैवैन्य अर्पन करेंहोंस
यस मटि खोतैमुत छुस फेकि बोर ॥ 8 ॥

दयस मंगेहो च्यथ मे थवतम
अन्ते समयस बे ह्यमेहोय नाव
अछव ते कोठेव मते पावतम
दफतम सेदि-बुथि लब सो तार ॥ 9 ॥

सुलि वुजनोवुम ते नाबद ख्योवुम
सोवुम पनेनिस पानस प्यठ
गूरे-गूरे कोरेमस सुबहन ते शामन
मंग्य-मंग्य ह्योतेमस दये अनेग्रह ॥ 10 ॥

ने त्र्येन मन्ज ने त्रुवाहन मन्ज
बन्द छुय पनेनिस मनस मन्ज
ख्यावुन, चावुन ओश करेनावुन
न्यबर मे त्रावुन वोपरेन मन्ज ॥ 11 ॥

दूर ओसिथ नजदीक भास्योम
नजदीक ओसिथ पानस सूत्य
पानस सूत्य-सूत्य मनेसेय मन्ज
मने मंज्य न्यबर त्रावन न जाँह ॥ 12 ॥

त्र्येन रूपन हेंज्ज वैष्णव माता
त्र्येन दीवन हुन्द नारायण
त्र्येन लूकन हुन्द ब्रह्मस्वरूप
त्र्येन न्येथरण हुन्द परम शिव ॥ 13 ॥

छोलेंमुत पलव तें छेजेंमॅच तन
क्याह करन दीवी द्वारन मन्ज
दीवी तें दिक्ता श्योजर मंगान
शौद्ध मन सत्संग तें भक्तीरस ॥ 14 ॥

त्र्येन भवनन हुन्द त्रिभुवननाथ
त्र्येन कर्मन हुन्द त्रिकर्मण देव
त्र्येन कालन हुन्द त्रिकाल दृष्टि
त्र्येन जलन हेंज्ज त्रिवेणी ॥ 15 ॥

भगवान वनान भक्तयन कुन
भक्ति तुहेंज्ज तें दर्शुन म्योन
सत्संग करुन गव दय प्रावुन
सत्संग करन वाल्यन सूँत्य ॥ 16 ॥

पूजायि खोते छुय भक्ति-भाव
भक्ति सूँत्य-सूँत्य शौद्ध वेचार
वेचारन सूँत्य सम-दृष्टि
तेऽली सपदी म्युल दयस सूँत्य ॥ 17 ॥

आय छा करान कोन्सि हुन्द पाय
आयस करैन्त्य छे पनैनी कोम
पाय युस करी तस रठ पाद
सुय छुय पानय तारनवोल ॥ 18 ॥

त्र्येन लरन हँन्ज गायत्री
त्र्येन युगन हुन्द यूगीश्वर
त्र्येन ग्वैरन हुन्द प्रयागराज
त्र्येन थंग्यन हुन्द त्रिकूट पर्वत ॥ 19 ॥

मनेकिस मंदरस चूनि जरैनावस
अन्द्य-अन्द्य लागस ज़रियि केम्खाब
अँथ्य मन्ज सौविथ खौनि ललैनाविथ
प्रौविथ मंगस सँदरस तार ॥ 20 ॥

शौनी ज्ञाने सूर्त्य छांड़ान तस
 मेलान कर्मीयस कर्मयूगे सूर्त्य
 यूगी यूगे सूर्त्य प्रावान तस
 लबान भक्त तस भक्ती सूर्त्य ॥ 21 ॥

सीवा करनस छने अनैवोर्य
 न छे अनैवोर्य गरे गच्छनस
 अनैवारि पनेने दर्शन करेहो
 बरेहो मन चानि भक्ती सूर्त्य ॥ 22 ॥

रंगरोस, रूपरोस आसनवोल
 बिहिथ शिन्याहस मन्ज शिन्याह पौठ्य
 वुछान सारिनैय वुछान ने काँह
 तस निराकारस करितव प्रणाम ॥ 23 ॥

सुमरण गरि-गरि तैमिसैन्ज करेहो
 ह्यमेहो तैमिसुन्द मनै-मैन्ज नाव
 वुजैमले त्रैविथ जूनैय बनेहो
 वनेहो सारिनैय गाशुक राज ॥ 24 ॥

खण्ड - 5

आत्मानुभव

THE FIFTH

THE FIFTH PART OF THE
HISTORY OF THE
LIFE OF THE
LORD OF THE

THE FIFTH PART OF THE
HISTORY OF THE
LIFE OF THE
LORD OF THE

THE FIFTH PART OF THE
HISTORY OF THE
LIFE OF THE
LORD OF THE

THE FIFTH PART OF THE
HISTORY OF THE
LIFE OF THE
LORD OF THE

आत्मानुभव

हुपौर्य, यपौर्य दिचैम नज़राह
पज़राह वुछुम नै कुनी अन्दैह
अन्दै-पैवय वुछिम पनेनी स्यठाह
व्यठाह खौरहम अपजिस प्यठ ॥ 1 ॥

थोदाह वुछुम फ्रस्ताह हयूह
अकैला वुछमस नैथिस प्यठ
बजर थज़रस छा आसान
नरमी बजराह पतय लारान ॥ 2 ॥

अपुज़ कौर्य-कौर्य शुर्य-बौच पोलिम
सथाह ओसैम मेति मेलि सौख
दोह-दोह गच्छान वौन्साह बढान
मे गव पानस बनान क्रन्ज़ ॥ 3 ॥

शुर्य-बौच पालान अपुज़ाह कोरुम
सौरी थैविम भ्रमस मन्ज़
ओखरस प्यठ येलि सफरस कोडैहस
न्यथैनोन थोवहस फेक्कन प्यठ ॥ 4 ॥

सूच-सूच सूचुम साथाह दिनम
अख-अख बनान दहि पतें काह
मे छा पताह कुनिरेंय थावनम
तेलि क्याज़ि वन्दहॉ अपज़िस प्राण ॥ 5 ॥

तोरे येलि आख न्यथेनोन ज़ाख
सॉम्पथ प्रॉवेंथ वैभव छेवुथ .
त्राविथ सोरुय न्यथेनोन द्राख
रोज़वुन कीवल दर्येसुन्द नाव ॥ 6 ॥

दान तय धर्म क्याह सॉ करन
हवन करन जेठि खोतें ज़्यूठ
लूकें दिल रखुन छुय बोड धरमाह
तमि खोतें बोड छुय परवोपकार ॥ 7 ॥

दान हय दिख तें कॉन्सि मो वन
हवनस प्यठ थव तन मन साफ
लूकें दिल रखितेंय अहंकार त्राव
परवोपकारि भास मो दि ॥ 8 ॥

हवनाह कोरुम तें खरचुम वार्याह
लूकें अरसाथाह सोम्बरेंम खाराह
कुलफाह कोरुम नवीद दिनेसैंय
वन मालि क्याह छुम बूगुन फल ॥ 9 ॥

रोछुम पनुन तें द्राव नें केंह
रोछुम परुद वुछुम शेहजार
पुछुम दयस यिम कम विह्य
वारें बोज अँथ्य वनान दासदारज ॥ 10 ॥

प्राण हय खोरुथ यि मा ज़ोनुथ
वालुन छुम नें पानस ताम
येलि नें अमिच छय चे बावथ
तेलि क्याज़ि लूभ तें अहंकार ॥ 11 ॥

ब्बेछि त्राव क्वेछि खस तस जानानस
म्बेछि मन्ज श्रोमराव पनँनुय पान
खयनें-खयनें व्यैठरावुन छुनें जान
मानकर मूशकस सूँत्य, चोलुन भार ॥ 12 ॥

ओसिथ वनुन छुम नॅ कॅह
 जीनिथ वनुन ज्यूनुम नॅ कॅह
 खयथ वनुन खयोम नॅ कॅह
 यिहोय गव मालि स्योदुय अपराध ॥ 13 ॥

योदवय चे छुय लबुन पज़र
 वन छुम स्यठाह ओसिथ नॅ कॅह
 ज्यूनुम स्यठाह जीनिथ नॅ कॅह
 खयोम स्यठाह खयथ नॅ कॅह ॥ 14 ॥

शेरि लागेहो बॅ तस पम्पोश
 युस वनि मे छु स्यठाह सन्तोष
 मगर मोह-मायायि मन्ज़ फॅसिथॅय
 वनि मा काँह मे छु दॅह दर दॅह ॥ 15 ॥

आसुन, बसुन तॅ बेयि दयिनाव
 अमि मन्ज़ मोकॅलाव गोडॅनिक्क जॅ
 दयिनाव सोर्घ-सोर्घ सोरुय प्रावख
 थावख जिन्दॅह पान शाहन मन्ज़ ॥ 16 ॥

सूरें मोत सूरह छेकिथ पानस
बम-बम भोले मंगान भिक्षा
शिक्षा दिवान अवगत करान
असि क्याह सनुन अथ व्यवहारस ॥ 17 ॥

काम त्राव, मोह त्राव बेयि अहंकार
क्रूधस, लूभस मो हे कॉम
यिम्न त्रौविथ सुमरण प्रौविथ
'कमअकल' ओसिथ बनख अकॅल ॥ 18 ॥

ज्वय मीज क्वलि सूँत्य कमि चिकॅचावय
दोशॅवॅन्य म्युँल गव नाव रूद अख
यिथय पौँठ्य म्युँल गछि दोशॅवॅन्य पानय
योदवय त्रावख ब्योन रोजुन ॥ 19 ॥

सँदराह वुछुम ज़ेठि खोतें ज्यूठ
नज़राह अपोर पिजिम नें केन्ह
वुफाह तुल्लेहोँ अस्मोँन्य वुड्डेहोँ
यि गछि आसुन त्युथुय वोवमुत ॥ 20 ॥

मेऽथरँ ऑस्यतन या सम्बन्धी
वुछख अगर छि क्व-वति प्यठ
फरँज ऑसिथ फरँज बनान
दिशा हॉविथ दिशा लबान ॥ 21 ॥

दूर दूरि मरँच मेठान
नखँ यिथ छुय व्यँठान नाबद
यिहोय वोर्नेमुत छु ऑकॅलमन्दव
मन रठ डण्जि गृहस्थस मन्ज ॥ 22 ॥

नार दज्ञान सेतार बजान
साज वज्ञान कनन मन्ज
भाव वुज्ञान न्यबर नेरान
फेरान जूँय छांडान कस ॥ 23 ॥

दोद हय छुय तँ चालख ना
वन-वन करनय नेरी क्याह
यी छुय ती छुय भूगुन पानस
अथ क्याह करन सन्त तय साध ॥ 24 ॥

कूराह खोनुम तें त्रेशाह चमॅहों
चनय दिवॅनम नॅ दयन जाँह
आकाश वॉणी गॅयम कनन
यिनेँ वॉल्य लूख करनय ओँही ॥ 25 ॥

वति पॅकिथ, थॅकिथ तें छेनिथ
थखाह कोडुम कुलिस तल
अँथ्य मन्ज गॅयम अँछ प्यठ अँछ
दय वुछुम रखवॉल्य जगतस ॥ 26 ॥

टेकिस मन्ज ट्योकाह मालि प्यठ माल
दोंराह ओँसॅस गासॅ लोव ह्युह
गरि द्राव साधू फकीर बनिरथॅय
शामॅ आव वापस लूदराह ह्युह ॥ 27 ॥

सेध्यन तें बोध्यन धोखें छा जान
वतिक्क्यन वथ डालॅन्च छा जान
धोखेंबाज गाटॅल्य ज्ञानान पानस
स्वर्गस दकॅ दिथ प्रावान नर्कस ॥ 28 ॥

धन-द्वार मेलुन गव दौख मेलुन
 नय मेलुन गव स्यठहँय सौख
 यि छुनँ सारिनँय तरान फिक्रि
 येम ज़ोन सुय वाति पानय तोर ॥ 29 ॥

पाप नय करख तँ प्रावख सौख
 पापस पतँ-पतँ सूँती दौख
 सौख-दौख मेलुन पानस ताम
 पाप त्राव, पोन्न्य प्राव आनंदमयी ॥ 30 ॥

ध्यान दारुन गव नार चापुन
 नार लँगिथ पतँ व्यतँरावुन
 युस नेरि सुय बनि नारँ द्राव सौन
 तस क्याह हाजथ अर्थ दारुन ॥ 31 ॥

चोन म्योन वन्तम करी क्याह
 सोरुय चोनय, चोन नँ कँह
 दाँनी ओसिथ मंगनस लागनख
 फिक्रि तारनख रोज़वुन नँ कँह ॥ 32 ॥

बैठिस पॅकय-पॅकय स्यठाह थोकुस
 वथा मीजिम नॅ अपोर तरनस
 पतॅ शाम गच्छम अँथि क्याह यियम
 सूच-सूच वुछुम अपारि पान ॥ 33 ॥

कुलाह वोवुम तॅ शुहुलाह लोबुम
 शेहजार द्युतुन प्रथ यात्रिस
 अँम्य मा सूच पनुन तॅ परुद
 यिथय पौठ्य बाँगराव चँति शेहजार ॥ 34 ॥

हरुद गव तॅ सौंथ आव
 राथ गैयि तॅ प्रवॅ पेयि
 शुरिल गैयि तॅ बजर आव
 अँथ्य सैनिथ वुछ दैवँ व्यवहार ॥ 35 ॥

जुव ओर तॅ कोठ दोर
 दयस मंग पनुन अनँग्रह
 दय छुय चोनुय पालनहार
 बाकय सौरी खयनँ-चनँ यार ॥ 36 ॥

अँछव तँ कनव वारँ बूज़िव
 कपेटिस रूज़िव खबरदार
 ओनाह तँ ज़ोराह लोंगिथ पँकिव
 चर-चर ज़ेवि हुन्द छोटैरोंविव ॥ 37 ॥

अख अख समान क्रकँ पोन्शि दिवान
 वदान पनैन्स सौखस सौरी
 सौख नय आस्यख दौख क्युथ पेयख
 कुस कस क्याज़ि छटान बाख ॥ 38 ॥

सौख नो गव धन-दयार आसुन
 आसुन, बसुन तँ बेयि हूहू
 यी छुय ती छुय सन्तुष्ट रोज़
 अरि जुवँ शुखन-बौचन मन्ज़ ॥ 39 ॥

कूर ज़्यनँ क्याज़ि गोय अलहुन्द बुथ
 यि हबा गव दयँ सुन्द द्युत
 शक्ति सँती सृष्टी बनान
 सृष्टी सँत्य-सँत्य अम्युक विस्तार ॥ 40 ॥

राथ मोकॅल्यव, पगाह यिनेवोल
कुरस ज्ञानि पगाह क्याह बननवोल
यि छु ति छु वुनिक्कन छु
अँथ्य मन्जु क्याह छु रोजनवोल ॥ 41 ॥

चोक तय मोदुर बेयि सौख-दौख
असुनाह, ग्युन्दनाह बेयि वदुनाह
रावुन प्रावुन पन तय परुद
शान्त मन मतलब जॉनिथ कुनुय ॥ 42 ॥

दूर थेंदिस कुलिस प्यठ
चूरि बिहिथ अख जानावार
सोंचान पनेनिस दिलस मन्जु
कर मेलि मेति मनुष्य जीवन ॥ 43 ॥

क्रकि बगॉर सन्तोष दिलुक
मनेच शॉन्ती इण्जि वेचार
छोपि हुन्द शान्त वातावरण
यिहोय गव अन्तःकर्णुक सौख ॥ 44 ॥

न्येन्द्राह कॅरॅम तें वॉन्साह गॅयम
अपुजाह वोनुम तें वोल्हस पापव
वॅन्य-वॅन्य वोनेहम छोलुम नें मल
त्रोविथ सोरुय दयि अनुग्रह प्रोवुम ॥ 45 ॥

अकोय ओसिथ, अकोय ज़ोनिथ
अकोय मोनिथ, अकोय प्रोविथ
अकोय वेनिथ, अकोय लेबिथ
अकोय सारिनैय हुन्द मूलाधार ॥ 46 ॥

मोलिस तें माजि हुन्द थ्वेथ भासान
भासान बडि खोतें बॅड्य दुश्मन
दौख-सौख त्युहुन्द नें अपनावान
सिरिफ क्याह साधन पतें फेरान ॥ 47 ॥

शूर्य छिम तें शुर नें काँह
पनैय छिम तें पुन नें काँह
सौख सोरुय तें सौख नें काँह
चटिथ सोरुय, खेटिथ मनस मन्ज ॥ 48 ॥

साध तय सन्त क्याह करनख
भाग्य-लिख्युत छा बदलान जौह
वव बा वव तें लोन बा लोन
समयस ओदीन प्रथ काँह कथ ॥ 49 ॥

रूपस तें रंगस क्याह सनुन
वनुन मुडस कुन रामायण
पैर्य-पैर्य परनस पर्युन करुन
मरुन गच्छि संसकारण प्यठ ॥ 50 ॥

लूकें अरसाथाह पतें-पतें साधस
दूरि-दूरि वुछुम कुस क्याह करान
साध हय तें हाव-भाव क्याह
सार्धे व्यवहारस ज़ख वातान ॥ 51 ॥

सैंदरस गवतें दिथ फोटुस नें केंह
फोटुस तें फोटुस आरें क्वलि मन्ज़
फटान फटान वेचार कोरुम
यस रछि दय, तस क्याह भय ॥ 52 ॥

द्युतनम दयन, अँछन मोथुम
 दय छुय जगत्तुक पालनहार
 वति प्यठ ओसिथ खयँनाह म्यूलुम
 दिनेँ वोल अख, खयनेँवॉल्य अनीख ॥ 53 ॥

सिरियस बुथि आव ओबरें लंगाह
 ताफ हय ओस तें अनिगटें किछ
 यिथें तुर यिवान बुथि सन्तोषस
 फटान कुकमी कँड्य-जालस ॥ 54 ॥

अन्यरुक जालाह वोलुम पॉन्य पानस
 नेरनस अन्द्य-पॅक्य थॉवॅम नें वथ
 ह्यनेँ आस जालस निनेँह आस कालस
 ओखरस कोडॅहस मोरदें पानय ॥ 55 ॥

काम, मोह, अहंकार त्रॉविथ
 क्रूधस तें लूभस दि गरदन
 सन्तोष प्रावख लोब ह्यथ यिमन
 'कमअकल' बनोवहख यिमव पांचव ॥

मनुष्याह वुछुम पोपेमुत टंग
डखेवैन्य लूराह वथ सारान
लैराह लदान तें वथरान सौन
फोल्लेवुन पोश तें गरि जोराह ॥ 57 ॥

वॉर तय हसद पालान सॉरी
मिलच्चार रोवमुत, मन्देछोमुत
आसुन-बसुन हुँम्य कति ओन
बोय छु बॉयिस ज़ागि रोज़ान ॥ 58 ॥

जिठेयन तें टाठेयन रोव आदर
इकैवटें रोज़ुन रोव तथ सूँत्य
रैत्य संसकार तें मान-मर्यादा
नेचुव वनि मॉल्लिस मोल क्याह गव ॥ 59 ॥

कैवसिपथ, कैवरबद बेयि कैव-वासना
मेलान सोलबै अज़ शुर्यन मन्ज़
कसमाह कैरिथ शुर्य-बॉच् मारान
व्यवहॉरी बनान बैल्य पंज्ययास्य ॥ 60 ॥

धोखेबाज़, अपज्योर, अपेजुय फोलान
भासान तस 'दय छुम खेवश'
पजरेचि, स्यजरेचि रजि युस लमान
प्रावान सुय छुय दयि-सन्तोष ॥ 61 ॥

गूरिस प्रेङ्चोम दौध क्युथ छुय
आबस ध्यार ते दौध मुप्तोय
आब गोय च्येय दौधस रठ हारे
बूजिथ गूर गव नजरन दूर ॥ 62 ॥

मॉल्य सूजनस वॉनिस निश
रोपयि ह्यतंस अकलि पाव
अकॉल कॅनिथ मोकॅलिथ गॅयम
बैति नेरॅ वॉन्य फालव दिथ ॥ 63 ॥

कर्म, क्रिया ते क्रियावान
पानस ओंधीन छी सॉरी
युथाह करख त्युथाह लोनख
संच्यथ रोजी कर्मफल म्यूठ ॥ 64 ॥

वैन्य-वैन्य सून्चुम वनँ कोताह
बूज्य-बूज्य थैकिम स्यठैहैय कन
वुछ्य-वुछ्य लोसम अँछ वार्याह
अपुजुय ग्वँराह तँ डन्जि रठ मन ॥ 65 ॥

पछ कँरमस तँ गँयम लछ
बोर तुलँमस तँ गोम लोर
लोल बोरमस तँ द्युतनम दोल
वाद कोरमस तँ अपुजुय साध ॥ 66 ॥

अँकिस-अँकिस वथ प्रँछान
प्रँछान-प्रँछान कदम पकान
काँह नँ पजँरँच वथ वनान
दय नियम पानय वथ हावान ॥ 67 ॥

सौखस मन्ज नँ मनेँच शॉन्ती
सौख छुय दयस मँशरावान
आँही मंगुस दितम गोरेँबत
तँथ्य मन्ज चावतम लोलँ-अमृत ॥ 68 ॥

राथ गेयि तें प्रकाश फोल
वन्दे चोल तें शीन गोल
सोथ गव तें बहार आव
ओबुर हटि तें गाह छटि ॥ 69 ॥

पृथ्वी त्रौविथ आकाश लोबुम
अँथ्य मन्ज वुछुम दयें-व्यवहार
दिवता सोंरी मनुष्यस जोगिथ
लोगिथ तोहमच अँकिस प्यठ ब्याख ॥ 70 ॥

जागि-जागि रूदुस जागान तस
खूचुस पनँन्यव करतूतव
हनि-हनि सँनिथँय पनँनिस वजूदस
दँदवन भास्योम, पनुन नें काँह ॥ 71 ॥

गौब्धँन बानन छि लोती ठानय
ठानन तल छुय बेसिथँय राज
ठानय डालख, चँ क्याह प्रावख
राज थव राजँय राजस निश ॥ 72 ॥

ओस बोराह तुलमुत गौबि खोतें गोबॅय
पॅक्य-पॅक्य भास्योम बाराह नें कॅह
बारें रोसॅ पॅक्य-पॅक्य स्यॅठाह थोकुस
गोब छुस गोमुत पापव सॅत्य ॥ 73 ॥

सोन्दर तन तय सोन्दर वॉणी
सोन्दर मनॅक वेच्चार
सोन्दर वातावरणस मन्ज
सोन्दर दयें सुन्द नाव ॥ 74 ॥

करॅनॉव्य नावि मन्ज बेहनोवनस
वोर्नेनम तार दिथ तारथ अपोर
नाव डॅज वॉतिथ मन्ज सॅदरस
अदय ज़ोनून दय छु तारनवोल ॥ 75 ॥

दूर्यर चोनुर्य नज़दीक भास्योम
नज़दीक ओसिथ मनस मन्ज
सूँती ओसिथ दूर क्याह गच्छुन
फेरुन अँन्य पॉठ्य अनिरस मन्ज ॥ 76 ॥

मालें ज़पान फाकें दरेंन्य
फाकन मंज़ स्यठाह हावभाव
फाकय दरुन तें फाकय रोजुन
अथ वनान मालि ब्वेछि गालेंन्य ॥ 77 ॥

काया मेरिथेंय मेचि सूर्त्य मीज
वजूद हय ओस सु कोत गव
ओसिथ-बेसिथ बस नावाह रूद
रुत ओस कोरेंमुत, फिरुख रुतुय ॥ 78 ॥

परुन तें लेखुन क्याह कर्यस
भरुन नटि-पानि सूर्त्य क्रेंजुल
परनस सूर्त्य-सूर्त्य रेंत्य वेचार
रेंत्य आसेंन्य गच्छन संसकार ॥ 79 ॥

बूज़िथ बूज़ुम बूज़ितव तोह्यति
पन हय कुलिस तें हिलि मा ज़ाँह
दय येलि यच्छि तय तेली हिलि
तोह्य कम कॉम करनावन वॉल्य ॥ 80 ॥

बॅड्य-बॅड्य पोशाह पोशें बागस मंज
वुछ्य-वुछ्य लूकन दिल तम्बलान
चॅह्य-चॅह्य तुलैरियन रस मेलान
यी पजि मनुष्यस थावुन याद ॥ 81 ॥

कॅन्य-कॅन्य लौयिथ कनि-कनि कोरॅनस
वन्तस क्याह बा यी छा जान
पोजुय ओसिथ पजराह वोनॅमस
अपुज सगॅनोविथ राजाह करिहे ॥ 82 ॥

असि क्याह मंगुनुय, सॅत्य मेचि मेलुन
पछ थव पनॅनिस कर्म-फलस प्यठ
मंगतस ओही जगतस किछॅय
सपदी सॅत्य-सॅत्य च़ेति अनॅग्रह ॥ 83 ॥

रंग हय कुनुय तॅ बेन्यर क्याजि
क्रॅहनिस दकॅ तय वोजॅलिस थफ
जीव हय कुनुय तॅ द्वैत क्याजि
वऽर त्रौविथ, लोल बाॅगराव ॥ 84 ॥

आय कूँत्याह तँ गँय कूँत्याह
यिन कूँत्याह तँ गच्छन कूँत्याह
यिनस तँ गच्छनस छा शुमार
शुमार कर पनँन्यँन करतूतन •॥ 85 ॥

कन्या ओसिथ कूर सपेदेयस
कोरि पतँ नौशि हुन्द नावाह प्योम
नौशि पतँ हशि हुन्द दरजाह म्यूलुम
तमि पतँ रूजँस अथँ मूरान ॥ 86 ॥

नेचिविस वुछिथ सोंचान मोल
ब्योल हय कुनुय चोक क्याज़ि रस
शकॉलि कुनुय तँ अकॉलि ब्योन
ब्योन कोर पनँन्यँव कर्म-फलव ॥ 87 ॥

आय बतँ ओसिथ बेयि दोर कोठ
यस पूश तस क्याह दूश
सु छु पनँनुय भूग भूगान
शूभान तँमिसुन्द वाख तँ वचुन ॥ 88 ॥

बायि म्यानि करख ना सवाबेंच कॉम
अर्थें रेंटिथ ऐमा तारतन अपोर
क्रेकि रोस अर्थेरोट हाजथ मन्दन
कुल वव फल छुय पपनवोल ॥ 89 ॥

क्रालें सॅन्ज म्येच तय रंगरुन रंग
सोनॅरस कॅहवॅट छे पानस सॅत्य
क्रालें अर्थें गेरिथ तें नारें भच्छि बेरिथ
सोबूत नीरिथ अदें छुय म्वल ॥ 90 ॥

मे क्याह सनुन चान्येन कथन
बें क्याजि करे नेंद्या चॉन्य
चें छुख बेंय, बें छुस चेंय
सु ति कुनुय, अँस्य ति कुनी ॥ 91 ॥

अर्थें मिलविथ अर्थेवास करव
बरव दिलन मन्ज माय-मोहबत
कुनुय छु दय तें कुनुय जीव
तेलि क्याजि वरतव द्वैतभाव ॥ 92 ॥

साधना तमिसैन्ज येम त्रोव सोरुय
बोरुय वोलिथ लोतुय रूद
लोतुय मेरिथ लोतुय तैरिथ
तति गव मील्लिथ तमिसैय सैत्त्य ॥ 93 ॥

अपेजिस सग तय पजरस द्रोत
धोखस, फरेबस ह्यवान कोम
सेद्येन तें बोद्येन अर्थ पेठ्य तारान
सोम्बरान सौम्पथ, दयस मेशरान ॥ 94 ॥

चोयशीथ लछ ज़नम दोरिथ
प्रोविथ मनुष्य-सुन्द थोद ज़नमाह
अँथ्य मन्ज शूभ्या धोखें मक्कोरी
तस क्युत दय छुय सम्होरी ॥ 95 ॥

शहरस, गामस यिहोय छे कथाह
वथाह रौवैख, लँबैख नें केंह
थेकिथ तें छेनिथ, मारें गेछिथ
बुथाह फुटिथ रूदिय पशेमान ॥ 96 ॥

क्रूध हय करख बोद्धि नाश गच्छी
घमण्ड खेयी ज्ञानस वेचारस
लालेंच दिवान द्रोत ईमानस
लोलस लोलें-सूँत्य सग मेलान ॥ 97 ॥

लरि सूँत्य लॅराह, शूबिदार नॅ केंह
फेकिस सूँत्य पयोकाह, गमखार नॅ केंह
यारस सूँत्य योरी, हमसीनॅ नॅ केंह
दयस सूँत्य माय, छेनि नॅ केंह ॥ 98 ॥

दोच्छि-दोच्छि ओही पानय प्रावान
ख्यावान युस छु न आसनस मंज
दिवता ति सौरी बौगिस प्रारान
वेष्णु-पाद छुस हृदयस मंज ॥ 99 ॥

गरें त्रौविथ गरें छोंडुम
गरें म्यूलुम गरें शान्त वुछुम
गरें छोनुय गरें बॅरिथ
गरें फोलिथ गरें दिवता सूँत्य ॥ 100 ॥

हुपौर्य, यपौर्य, चोपौर्य अनिगोट
लूट, खसूट तँ अपेजिस कॉम
बोय बौयिस रतस जागान
कोरि रोव विश्वास मौलिस प्यठ ॥ 101 ॥

लॅम्य लॅम्य लमान, नावि छेन्न्य रज़
नाव गॅयि नीरिथ सॅदरस कुन
दयस मंग्य-मंग्य नाव लॅज बैठिस
यस रछि दय मरि नॅ जाँह ॥ 102 ॥

दूरि-दूरि रूजिथ चूरि रूदुस
अनिगटि कोडॅनस वनि रूदुस
छॉन्ड्य-छॉन्ड्य छोन्डॅनस लबि रूदुस
अनॅग्रह कॅर्य-कॅर्य मटि रूदुस ॥ 103 ॥

मनॅ किस नागस नाल वलिथ
नागरूपस मन्ज़ असुर बिहिथ
नागस ब्रौठॅकनि ध्यान दौरिथ
मन डौलिथ छुस वतॅ-प्युर करान ॥ 104 ॥

मतलब्य यारस बेयि आँशनावस
मतलब नीरिथ ज़ानान नँ कँह
अऽकँल बेनिथ बेकँल ज़ानान
फरान पनैसि अऽकँबतस ॥ 105 ॥

आँबव सूँती मनुष्याह बेरिथँय
फेरिथँय न्यूमुत लूकन सौख
दौख हय कौन्सि मरहम करतस
बरतस लोल प्रथ रगि मन्ज़ ॥ 106 ॥

मुज्यन तँ गोगँज्यन क्याह सम्बन्ध
ज़लस तँ तीलस म्युल नँ कँह
हिशर नँ हशि-नौशि व्यवहारस
ब्योन थव त्रेशँवन्य, भूगख सौख ॥ 107 ॥

अँक्य सँन्ज़ मेहनत, आहार बेयि सुन्द
अँक्य कर सन्चेथ, बेय तुल सौख
अँक्य सुन्द गहनँ, बेय सुन्द कन
यिहोय गव मालि दैवँ व्यवहार ॥ 108 ॥

सु तें बें, बेयि नें काँह
तवय भास्योम बेति सुय, सुति बेय
रुजिथ यिथिस व्यवहारस मन्ज
तेलि क्याजि लूभ, मोह तें अहंकार ॥ 109 ॥

युस नें कुनी, सु कति आव
युस नें कुनी, सु कस जाव
युस नें कुनी, तस क्याह नाव
युस नें कुनी, तस बावें-भाव ॥ 110 ॥

बुजेंमलें तें गगॅरायि क्याह करनस
यस आसि तेंमिसुन्द अनेग्रह सूर्त्य
मन्दर तय मशीदें क्याह करनस
यस आसि मन कपेट्थन सूर्त्य ॥ 111 ॥

सिरियि तें चन्द्रम बेनितव सौरी
गाशिरौव्यतोम जगि हुन्द प्रथ अन्द
नें छुख बोड़ तय नें छुख लोकुट
सोनेय बेनितव करतूतव सूर्त्य ॥ 112 ॥

खण्ड - 6

विस्थापन

विस्थापन

तुल्य-तुल्य सोम्बरान ओलाह वूनुम
फाह म्यूल तैथ्य मन्ज दोहै वादन
वुडैवुन ग्रद आव नजराह त्रौवैन
ओल नाहनोवनम, चैलरोवनस ॥ 1 ॥

छन जायाह रैटमैच बोनि शेहजारस
आसन दौरिथ ध्यानस मन्ज
आरस अँन्द्य-पैक्य व्यनै अम्बाराह
बोजिना दय म्योन मेति दियि जायाह ॥ 2 ॥

कोफूर रंगे छुय सैधि हुन्द ज़ल
सैधि मंज श्रानाह पापन र्छै
गंगेबलै गंगा शौदयपोरै संगम
कति बोजि राजा बेयि दियि नाद ॥ 3 ॥

डेकैह-लौनिस असि क्याह ओस लीखित
अडैरौचन मन्ज गरैबार त्रौव
क्याह ओस कोरैमुत असि प्यव बूगुन
दमबर तैमिसुन्द ज़िन्दै थोवैनख ॥ 4 ॥

कोंगें बागस मंज कोंगेंदूर शूभान
चमकान फुलया जून पछस मन्ज
बोनि हवाहस मंज बोनि सबजाराह
वोज़लान बोनिपन हरदें खतस मंज ॥ 5 ॥

पोशेंबाग होखिमैत्य, हून्य वुन्गान
चलैलार लूकन गरें गच्छनस
रतें सूँत्य सड़कन वोज़जार गोमुत
राक्षस वोपेंदेय ऋषिवारि मंज ॥ 6 ॥

हौरी, कौली तें बद्रकौली
शारिका, राजा बेयि ज़ाला
पाठाह परेंहौव, भजनाह करेंहौव
राथाह वसैंहौव तुलैमुल प्यठ ॥ 7 ॥

बुरें लैज्य नज़राह माजि कशीरि
लोब ह्योत ततिक्क्यव पीरव फकीरव
ग्रजवैन्न्य व्यथ औस, शोपरौवैख
लोगुख ग्युंदनाह चकिसेय तल ॥ 8 ॥

इकवटॅ दोशंवय प्रातःकालस
पेक्क-पेक्क लालस लोल बरान
अकि अन्दे घण्टा बेयि अन्दे अज्ञान
अख अज्ञान मन्देस ब्याख दरगाह ॥ 9 ॥

रेंचवॉर, ऋषिवॉर सॉन्य ज्यने जायाह
परनाह प्यमॅहोस सप्तऋषियन तल
कश्यप, नुन्देऋयोष बेयि ऋषिपीर
अन्द वॉत्यतन वोन्य सोन वनेवास ॥ 10 ॥

अमरनार्थेच अमर कथा, अमर कोतर जूस्य
अमरावती अमरबूत, अमर अत्युक्त वजूद
अमर वॉतिथ अमर सपेदिथ, अमर अमिसुन्द नाव
अमर वनेथेय अमर करतम, अमर तसुन्द लोल ॥ 11 ॥

वनेहॉ वनेकिस यारि-कुलिस कुन
कथे चाख करेहॉ फ्रस्तस सूत्य
नजराह त्रावेहॉ बोनि-लंगन कुन
त्रेशेवेंय त्रोवेहस गरे-बरे दूर ॥ 12 ॥

नौशन तँ कोखन, हशन तँ माजन
क्याह प्यव वुछुन तँ क्याह भूगुन
असि त्रोव सोरुय, असि रूद मान
बठ्ठेन लोरि, लारँ-लार शालन ॥ 13 ॥

वोतँशन, मनिगाम बेयि वासँकुर
साधना भूमि रोपे भवानी
माधव धरँ सँज अलख-ईश्वरी
चश्मे-साहिबी नियाज तय प्रणाम ॥ 14 ॥

आँखँरस लग्य अँस्य शीनँ प्यठे तापस
वापस फेरनँव कर यियि विज
बादामवारि हँज बादाम फुलया
दीवी आंगनँकय तँत्य-तँत्य गौर्य ॥ 15 ॥

बोनि शेहजारुक शुहुलाह करँहो
ननँवोर पकँहो प्यठ सबजारस
बोनिपन जॉलिथ वुशनेर करँहो
पकँहो शीनँ पेठय खँ त्रावान ॥ 16 ॥

किताबि हुन्द नाव	:	कण्ठपोश
कवि	:	चमन लाल राजदान
सकूनत	:	107-डी, पॉकेट-बी दिलशाद गार्डन दिल्ली - 110095 दूरभाष - 22136144 22117804
छापन वरी	:	2003
तेदाद	:	500
सर वर्क	:	वीरेन्द्र राजदान
कंप्यूटर डी. टी. पी	:	संजय काचरू सुरेन्द्र राजदान
छापखाना	:	व्यैथ ग्राफिक्स 09818190360 09810034653
म्वल	:	रु 50.00
पब्लिशर	:	शारदा पब्लिकेशंस जम्मू तवी

(© येमि किताबि हँन्द्य सॉरी हकूक छि महफूज)